



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIAL

Komunikadu Imprensa

Periodu : Novembru 2011

Edisaun : 03 Nevembru 2011

JSMP Kongratula Feto Hotu-Hotu Ba Selebrasaun Loron Feto Nasionál

Iha loron 3, fulan Novembru kada tinan, selebra nu'udar loron nasionál ba Feto Timór Léste. Loron ida ne'e, nu'udar loron importante ida ba comunidade feto sira iha nasaun Timór Léste, tanbá hatu'ur loron ida ne'e hanesan loron nasionál. Komitmentu ida ne'e, hatudu katak Estadu Timór Léste, rekoñese importansia husi kontribuisaun, papel no partisipasaun feto nian iha kontestu hari'í no dezemvolvimentu nasionál.

Mesmu nune'e, durante esperiensa servisu monitorizasaun JSMP nian iha tribunál hat hanesan iha: Dili, Baucau Suai no Oecusse, JSMP deskobre katak, maioria kazu sira ne'ebé rejista no julga iha tribunál sei kontinua domina husi kazu ne'ebé asosiadu ho violénsia bázeia ba jéneru.

Kazu hirak ne'e inklui violénsia doméstika, violasaun seksuál hasoru menor no adultu, abuzu seksuál, abandona no natureza krime sira seluk ne'ebé bele fo todan/pezu ba responsabilidade nasaun iha futuru. Pior liu-tan, vítima hirak ne'e kontinua hasoru dezafiu boot no kompleksu tanbá provizaun tekniku prosesuál balun ne'ebé interpreta la ho maneira no sentidu ne'ebé neutru no proporsional. Partikularmente, Artigu 125 Kódigu Prosesu Penál (KPP) sei kontinua sai dezafiu estruktural ba vítima sira atu hetan justisa ba sira nia kazu.

JSMP haksolok, tanbá Tribunál Rekursu hasai ona akordaun ida konabá konfliktu interpretasaun ba Artigu 125 KPP, maibé JSMP enkoraza Tribunál Rekursu atu sosializa akordauan ne'e ba autóridade judisiáriu sira hotu atu iha sentidu intepretasaun ida ne'e hanesan konabá artigu refere.

Diretór ezekutivu JSMP, Luis de Oliveira Sampaio haktuir katak " *JMSP kongratula comunidade feto sira no komponente sosiedade tomak ne'ebé halo parte ba movimentu luta hakotu violénsia hasoru feto ba selebrasaun loron nasionál feto nian, no konvida ema hotu atu hanoin saida mak ita halo ona, no saida mak persija hametin liu tan iha futuru atu hakotu violénsia hasoru feto.*

JSMP hein katak liu husi selebrasaun loron nasionál ida ne'e, fo biban komponente sosiedade Timór Léste tomak hanoin no refléta saida mak persiza hametin diak liu tan iha futuru atu

asegura katak ema hotu, tantu fetu ka mane iha opsaun, oportunidade no direitu ne'ebé hanesan atu livre husi kualker forma violénsia hasoru sira nian an nu'udar kriatura umana.

JSMP mós konsiente katak maske maluk fetu sira, partikularmente fetu sira iha área rurais, sei nafatin hasoru dezafiu estruktural oi-oin atu defende sira nia direitu konstitusional sira, tanbá influensia husi prátika kostume lokal ne'ebé mak dala barak diskriminativu no la hatu'ur fetu hanesan kriatura ne'ebé soi direitu, obrigasaun no dignidade hanesan ema umana ida. Mesmu nune'e, JSMP enkoraza ema hotu atu labele lakon espiritu hodi luta nafatin hasoru violénsia, diskriminasaun no asaun sira seluk ne'ebé mak prezudika fetu sira.

JSMP mós ejije ba orgauns estadu sira, liu-liu governu atu hari'í sistema no polítika ida ne'ebé mak adekua hodi garantia fetu sira hetan protesau adekuada no iha fatin ne'ebé justu ba sira atu reklama no proteze sira nia an husi kualker forma violénsia hot-hotu hasoru sira.

Atu hetan informasaun kle'an, favor kontaktu;

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Landline: 3323883